



Broj: UP1 03-1-37-5-337-6/24  
Datum: 10.12.2024. godine

Na osnovu člana 40. stav (1) tačka a) Zakona o zaštiti ličnih podataka („Službeni glasnik BiH“ broj: 49/06, 76/11 i 89/11) i člana 78. Zakona o upravi („Službeni glasnik BiH“ broj: 32/02, 102/09 i 72/17) rješavajući po službenoj dužnosti u predmetu obrade ličnih podataka učenika osnovnih i srednjih škola sa područja Kantona Sarajevo propisane Pravilnikom o vođenju evidencije o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštitu učenika objavljenim u Službenim novinama Kantona Sarajevo broj: 33/24, donesenim od strane Ministarstva za odgoj i obrazovanje Kantona Sarajevo, nakon izvršenog posrednog inspekcijskog nadzora, inspektor Agencije za zaštitu ličnih podataka u Bosni i Hercegovini, *donosi*:

### RJEŠENJE

- I Zabranjuje se osnovnim i srednjim školama sa područja Kantona Sarajevo da obrađuju podatke koji otkrivaju zdravstveno stanje učenika, te podatke o njihovim profilnim slikama na društvenim mrežama u Evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštitu učenika, koja je propisana Pravilnikom o vođenju evidencije o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštitu učenika objavljenim u Službenim novinama Kantona Sarajevo broj: 33/24.
- II Nalaže se osnovnim i srednjim školama sa područja Kantona Sarajevo da unište podatke koji otkrivaju zdravstveno stanje učenika i podatke o njihovim profilnim slikama na društvenim mrežama prikupljene u okviru Evidencije o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštitu učenika.
- III Ministarstvo za odgoj i obrazovanje Kantona Sarajevo, kao donosilac Pravilnika o vođenju evidencije o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštitu učenika objavljenog u Službenim novinama Kantona Sarajevo broj: 33/24, dužno je bez odgađanja obavijestiti osnovne i srednje škole sa područja Kantona Sarajevo o upravnim mjerama iz tačke I i II dispozitiva i preduzeti normativne aktivnosti i mjere s ciljem provođenja istih.
- IV Ministarstvo za odgoj i obrazovanje Kantona Sarajevo dužno je u roku od 15 dana od dana prijema Rješenja dostaviti Agenciji za zaštitu ličnih podataka u Bosni i Hercegovini pismenu obavijest i dokaze o preduzetim aktivnostima na izvršenju izrečenih upravnih mjera.

### Obrazloženje

I Agencija za zaštitu ličnih podataka u Bosni i Hercegovini (u daljem tekstu: Agencija) je na osnovu informacija iz medija pokrenula postupak za utvrđivanje zakonitosti obrade ličnih podataka učenika osnovnih i srednjih škola sa područja Kantona Sarajevo, koja je propisana Pravilnikom o vođenju evidencije o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštitu učenika objavljenim u Službenim novinama Kantona Sarajevo broj:

33/24 (u daljem tekstu: Pravilnik), donesenim od strane Ministarstva za odgoj i obrazovanje Kantona Sarajevo (u daljem tekstu: Ministarstvo).

S tim u vezi, inspektor Agencije je 16.09.2024. godine, izvršio posredan inspeksijski nadzor u Ministarstvu, te je aktom broj: UP1 03-1-37-5-337-4/24 zatražio informacije o pravnom osnovu i svrsi propisivanja obrade ličnih podataka o zdravstvenom stanju učenika, mentalnim sposobnostima u pogledu savladavanja nastavnog gradiva ili sposobnostima nošenja sa problemima, odnosu vršnjaka, nastavnika i roditelja prema njima, te podataka u vezi sa ponašanjem na društvenim mrežama, kao indikatora neprihvatljivih oblika ponašanja i drugih faktora koji mogu ugroziti najbolji interes učenika, a koji podaci su propisani u tačkama 4., 10., 11., 12., 18., 21., 22., 26., 27., 33., 35., 36., 37., 38., 39., 40., 43., 44., 45., 46., 47., 48. i 49. Evidencionog lista-Liste indikatora za rano prepoznavanje faktora rizika i/ili drugih faktora koji mogu ugroziti najbolji interes učenika/učenica i zaštite učenika. Takođe, zatražena je informacija o pravnom osnovu i svrsi određivanja da evidencioni list iz člana 6. Pravilnika predstavlja dio pedagoškog kartona učenika, da se isti čuva u stručnoj službi škole, ažurira, prati i dopunjava u skladu sa potrebama učenika.

U aktu broj: 11-07/02-02-42657-1/27 od 24.09.2024. godine, Ministarstvo se izjasnilo da se Agencija u svojim aktima nije osvrnula da je Ministarstvo 2019. godine donijelo Pravilnik o vođenju evidencije o neprihvatljivim oblicima ponašanja i zaštiti učenika („Službene novine Kantona Sarajevo“ broj: 29/19), te da je isti bio na snazi od 18.07.2019. godine do 31.08.2024. godine, kao i da su donesene izmjene i dopune tog pravilnika („Službene novine Kantona Sarajevo“ broj: 38/22). Ministarstvo je navelo da je u periodu prije usvajanja pravilnika iz 2019. godine imalo korespondenciju sa Agencijom u vezi sa istim.

U izjašnjenju je navedeno da je pravni osnov za donošenje Pravilnika sadržan u članu 66. stav (1) i (2) Zakona o organizaciji organa uprave Federacije BiH („Službene novine Federacije BiH“ broj: 35/05) kojim je propisano da Federalni i kantonalni organi uprave i samostalne upravne organizacije mogu donositi podzakonske propise iz svoje nadležnosti u cilju omogućavanja izvršavanja zakona i drugih propisa za koje su zaduženi, te u članu 74. stav (4) tačka h) Zakona o odgoju i obrazovanju u osnovnoj i srednjoj školi („Službene novine Kantona Sarajevo“ broj: 27/24). U nastavku izjašnjenja citiran je član 74. naprijed navedenog zakona, te navedeno da pratiti zdravstveno stanje iz stava (4) tačke g) navedenog člana, podrazumijeva holistički pristup učeniku u skladu sa definicijom zdravlja Svjetske zdravstvene organizacije, koja zdravlje definiše kao „stanje potpunog fizičkog, duševnog i socijalnog blagostanja, a ne samo odsustvo bolesti i iznemoglosti“, a da je prema tački h) škola dužna voditi evidenciju o neprihvatljivim oblicima ponašanja i/ili drugim faktorima koji mogu ugroziti najbolji interes učenika.

Nadalje, u izjašnjenju je navedeno sljedeće:

*„Indikatori u Pravilniku su rezultat stručnog rada eminentnih stručnjaka iz akademske zajednice i školske prakse: Lejle Kafedžić, Sandre Bjelan Guska, Elme Omersoftić, Lejle Osmanagić, Elmedina Muratbegovića i bili su u upotrebi u vidu publikacije Ministarstva sve vrijeme od prvobitnog usvajanja Pravilnika o vođenju evidencije o neprihvatljivim oblicima ponašanja i zaštiti učenika („Službene novine Kantona Sarajevo“ broj: 29/19), dostupni na stručnim usavršavanjima profesionalaca u obrazovanju, kao i na web stranici Ministarstva, link: Sigurnost i zaštita učenika, od 2021. godine. Sadržaj publikacije iz koje se izvode indikatori dostavljamo u prilogu. (Prilog 3). Indikatori koji se odnose na različite oblike nasilja na internetu uvršteni su na osnovu Smjernica za postupanje u slučaju nasilja nad djecom u digitalnom okruženju Bosne i Hercegovine koje su izradili profesionalci iz oblasti sigurnosti, mentalnog zdravlja i institucija, te je u navedenoj grupi učestvovao i predstavnik Ministarstva sigurnosti Bosne i Hercegovine koji i potpisnik predgovora. Navedenu publikaciju dostavljamo u prilogu. (Prilog 4). Napominjemo da su ovi indikatori bili integrisani i u Pravilnik o izmjenama i dopunama Pravilnika o vođenju evidencije o neprihvatljivim oblicima ponašanja i zaštiti učenika („Službene novine Kantona Sarajevo“ broj: 38/22). Svi indikatori uključeni u Pravilnik upravo upućuju ili na neprihvatljive oblike ponašanja i/ili na faktore koji mogu ugroziti najbolji interes učenika i sačinili su ih stručnjaci različitih naslanjajućih*

profesija i ekspertiza koje se usko bave djecom i njihovom ukupnom zaštitom (odgoj i obrazovanje, socijalne prilike, mentalno zdravlje, sigurnost i sl.). Napominjemo da je novi Zakon, u odnosu na Zakon o osnovnom odgoju i obrazovanju („Službene novine Kantona Sarajevo“ br. 23/17, 33/17, 30/19, 34/20 i 33/21), proširio pravni osnov i na obavezu vođenja evidencije „o drugim faktorima koji mogu ugroziti najbolji interes učenika“.

Nadalje, u Vašem aktu tražite informacije, gdje Ministarstvo nalazi pravni osnov za određene indikatore iz Liste indikatora koji su sastavni dio kao prilog Pravilnika, te ste vjerovatno metodom slučajnog uzorka izabrali određene indikatore za koje prema Vašoj procjeni za neke indikatore pronalazite pravni osnov, a za neke je pravni osnov upitan. Smatramo da je pravni osnov sadržan u naprijed navedenom članu 74. stav (4) tačka h) Zakona, a isto se bliže razrađuje pravilnikom što je u skladu sa članom 68. Zakona o organizaciji organa uprave u Federaciji Bosne i Hercegovine („Službene novine Federacije i Hercegovine“, broj: 35/05), koji propisuje da se pravilnikom bliže razrađuju pojedine odredbe federalnog, odnosno kantonalnog zakona radi osiguranja uvjeta za odgovarajuću primjenu tog zakona.

Bilo kakva proizvoljnost u procjeni šta jeste, a šta nije faktor rizika, ne bi bila svrsishodna, jer su u izradi liste faktora rizika i neprihvatljivih oblika ponašanja učestvovali stručnjaci iz prakse i iz akademske zajednice čija je ovo uža specijalnost. Primjera radi, na listi „spornih“ indikatora za koji tražite informaciju o pravnom osnovu je i indikator koji se odnosi na: „22. učenik pokazuje teškoće prilikom savladavanja nastavnog gradiva“ te je upravo navedeni indikator osnovno načelo i cilj obrazovnih sistema u cijelom svijetu. Šta je drugo zadaća škole nego da odgaja, obrazuje i prati na koji način i u kojoj mjeri učenik napreduje, savladava nastavne sadržaje jer na osnovu naprijed navedenog mora ocijeniti učenika, a ocjena prati učenika cijeli život jer se evidentira u dokumente trajne vrijednosti. Navedeni indikator treba da blagovremeno bude uočen, evidentiran, da skrene pažnju na potencijalne uzroke teškoća prilikom savladavanja nastavnog gradiva, te da postane razlog da se za učenika izradi plan podrške i stručnog tretmana u skladu sa Pravilnikom o provođenju odgojno-obrazovne podrške i stručnog tretmana učenika („Službene novine Kantona Sarajevo“ broj: 33/24).

Vođenje dokumentacije i evidencije u školi propisano je u članu 48., 49., 50., 51, 52 i 57. i 58 Zakona. Član 48. stav (1) Zakona propisuje da se u elektronskom i/ili materijalnom obliku vodi dokumentacija i evidencija u skladu sa propisom koji donosi Ministarstvo, stav (2) propisuje odgovornost uposlenih da uredno i blagovremeno vode dokumentaciju i evidenciju.

Član 49. Zakona propisuje da se u školi između ostalog vodi evidencija o učeniku, uspjehu učenika u učenju, vladanju i izostancima kao i odgojno-obrazovnom radu.

Član 51. stav (1) propisuje da evidenciju o učeniku čine podaci o njegovom identitetu (lični podaci o identitetu roditelja, obrazovnom, socijalnom i zdravstvenom statusu i/ili invaliditetu), uspjehu učenika, te podaci o preporučenoj i pruženoj dodatnoj obrazovnoj, zdravstvenoj i socijalnoj podršci.

Član 51. stav (5) podaci o zdravstvenom statusu učenika obrađuju se radi osiguranja posebnih odgojno-obrazovnih potreba učenika i opšte dobrobiti učenika, a to su: o zdravstvenom statusu, vrsti oboljenja, dijagnozi, terapiji, mjerama podrške i slično.

Član 52. stav (1) tačka e) evidenciju o uspjehu učenika čine podaci o odgojno-disciplinskim mjerama i ocjenama iz vladanja.

Član 52. stav (1) tačka i) evidenciju o uspjehu učenika čine podaci o drugim statusima/okolnosti u skladu sa potrebama Ministarstva/Instituta.

Član 57. podaci iz matične knjige i elektronska dokumentacija se ličnim podacima učenika i njihovom uspjehu čuvaju se trajno, a podaci iz drugih evidencija čuvaju se 5 godina.“

U nastavku izjašnjenja citirane su odredbe člana 3. i 58. Zakona o odgoju i obrazovanju u osnovnoj i srednjoj školi u Kantonu Sarajevo, te člana 5. Pravilnika.

Kako je dalje navedeno, Vlada Kantona Sarajevo je donijela Pedagoške standarde i normative za osnovne i srednje škole („Službene novine Kantona Sarajevo“ broj: 10/24), kojim je u

dijelu opisa poslova nastavnika u okviru radne sedmice određeno praćenje i vrednovanje rada učenika kao i kompletno napredovanje učenika, kako u odgojnom tako i u obrazovnom smislu, saradnja sa svim sudionicima koji mogu doprinijeti individualnom razvoju, dobiti i zaštititi zdravlje učenika, uključujući i konsultacije sa roditeljima. U djelu koji se odnosi na poslove i zadatke psihologa, pedagoga i socijalnog radnika, određeno je da vođenje dokumentacije i evidencije u skladu sa zakonom i podzakonskim aktima, prikupljanje i korišćenje podataka o učenicima i porodicama u skladu sa etikom struke, etičkim kodeksom i važećim propisima o zaštiti ličnih podataka.

U izjašnjenju je dalje navedeno sljedeće:

*„Vaše pitanje o pravnom osnovu da se evidencioni list nađe kao dio pedagoškog kartona, dakle u skladu sa članom 48. Zakona u školi se vodi evidencija i dokumentacija u školi, te se u članu 9. Pravilnikom o vođenju pedagoške dokumentacije i evidencije u osnovnoj školi („Službene novine Kantona Sarajevo“ broj 46/18, 3/20, 25/21, 24/23, 33/24) i Pravilnika o vođenju pedagoške dokumentacije i evidencije u srednjoj školi i domu učenika („Službene novine Kantona Sarajevo“ broj 4/19, 9/19, 25/21, 34/23 i 33/24) u članu 34. propisano je da se vodi Pedagoški karton učenika na propisanom obrascu.*

*Pedagoški karton u koji se evidentiraju: Odnos roditelja prema učeniku, zapaženoj porodičnoj podršci, (na primjer više brige, prezaštićen odnos), zapažanje o kognitivnom razvoju, zapažanja o motoričkom razvoju, zapažanju o socio-emotivnom razvoju, napredovanju i sklonostima, zdravstveni podaci, s obzirom da su vođenje evidencije iz Pravilnika odnosi na praćenje navedenih obaveza stručnog saradnika, kao i da je propisan način čuvanja Pedagoškog kartona, važno je da navedeni dokumenti budu sastavni dio pedagoškog kartona da se prate i dopunjavaju u skladu sa potrebama djeteta i obaveze kontinuiteta u radu ali i obavezne izrade Individualnog plana podrške i brige. Dakle, svi podaci na jednom mjestu pomažu stručnom saradniku da na kvalitetan način donosi procjenu o kontinuitetu u razvoju djeteta, ranije poduzetim mjerama podrške, indikatora koji stručnom saradniku mogu ukazati s kojim se izazovima dijete suočavalo kao i koje mjere podrške mogu pomoći djetetu, a koje su neučinkovite, ali istovremeno osiguravaju zaštitu ličnih podataka, jer pristup pedagoškom kartonu ima isključivo stručni saradnik u školi (pedagog). S obzirom da se evidencioni listovi kao i pedagoški karton čuvaju u zaštićenim prostorima u kancelariji stručnog saradnika, važno je da zbog čuvanja podataka i njihove zaštite svi podaci budu na jednom mjestu.*

*Želimo Vas informisati da pedagoški kartoni nisu inovacija i isti se koriste u obrazovnim sistemima, širom svijeta, ali u ovom slučaju navest ćemo se na pedagoške kartone:*

1. Kanton Sarajevo
2. Tuzlanski kanton
3. Francuska

*Pozivamo Vas da od obrazovnih vlasti u Bosni i Hercegovini zatražite pedagoške kartone kako biste pogledali sadržaj istih, te utvrdili koja vrsta podataka se prikuplja i obrađuje, te da li se njihovim vođenjem „zadire u privatnost učenika“.*

Osim navedenog, Ministarstvo je u svom izjašnjenju istaklo svoje stavove te statističke podatke o postojanju legitimnih ciljeva za predmetnu obradu ličnih podataka i neophodnosti iste u demokratskom društvu. Takođe, Ministarstvo upućuje na odredbe Konvencije o pravima djeteta i Okvirnog Zakona o osnovnom i srednjem obrazovanju u Bosni i Hercegovini, te obavezama prema Skupštini i Vladi Kantona Sarajevo.

U prilogu izjašnjenja dostavljen je Pravilnik o vođenju evidencije o neprihvatljivim oblicima ponašanja i zaštiti učenika („Službene novine Kantona Sarajevo“ broj: 29/19 i 38/22), zatim Pravilnik o vođenju evidencije o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštiti učenika („Službene novine Kantona Sarajevo broj: 33/24), Program (sekundarne) prevencije neprihvatljivih oblika ponašanja i zaštite učenika u osnovnim školama Kantona Sarajevo-Materijal za obuku nastavnika i stručnih saradnika (izdanje iz 2019. godine), Smjernice za postupanje u slučaju nasilja nad djecom u digitalnom okruženju u

Bosni i Hercegovini (izdanje iz 2017. godine), zatim fco. Mišljenja Ureda za zakonodavstvo Vlade kantona Sarajevo broj: 09-02-38818/24 od 19.08.2024. godine, Mišljenja Ministarstva pravde i uprave Kantona Sarajevo broj: 03-04/1-02-38836/24 od 13.08.2024. godine, Zaključka Vlade kantona Sarajevo broj: 02-04-37009-31/23 od 24.08.2023. godine, akta Ministarstva broj: 11-03/02-34-23087-3/23 od 23.08.2023. godine, Informacija Ministarstva broj: 11-03/02-34-23087-2/23 od 23.08.2023. godine i broj: 11-02-04-14135-6/24 od 25.03.2024. godine, akta Službe za skupštinske poslove Kantona Sarajevo broj: 15-04-14398-1/24 od 16.04.2024. godine, Zaključka Skupštine Kantona Sarajevo broj: 01-04-14398-1/24 od 08.04.2024. godine, Zaključka Vlade Kantona Sarajevo broj: 02-04-28640-36/24 od 16.05.2024. godine sa Akcionim planom za prevenciju maloljetničko prijestupništva i rad sa maloljetnicima u kontaktu sa pravosudnim sistemom u Kantonu Sarajevu 2024-2028. godine.

U provedenom postupku utvrđeno je sljedeće:

*Ministarstvo je Pravilnikom propisalo obradu ličnih podataka učenika osnovnih i srednjih škola, koji otkrivaju njihovo zdravstveno stanje (opekotine, prelomi, modrice, ožiljci, povrede, tikovi, bolovi u stomaku, glavobolje, mučnine, poteškoće u kontroli mokrenja i pražnjenja crijeva, tepanje, mucanje i usporen razvoj govora), te podatke o njihovim profilnim slikama na društvenim mrežama u Evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika.*

**II** Zakon o zaštiti ličnih podataka (u daljem tekstu: Zakon) predstavlja osnovnu legislativu koja neposredno određuje obradu ličnih podataka. Shodno članu 1. Zakona, njegov osnovni cilj je da svim licima na teritoriji Bosne i Hercegovine, bez obzira na njihovo državljanstvo ili prebivalište, osigura zaštitu ljudskih prava i osnovnih sloboda, a naročito pravo na privatnost i zaštitu podataka u pogledu obrade ličnih podataka koji se na njih odnose.

U skladu sa članom 3. Zakona:

- *lični podaci* znače bilo koju informaciju koja se odnosi na fizičko lice koje je identifikovano ili se može utvrditi identitet lica,

- *posebne kategorije* podataka su svi lični podaci koji otkrivaju:

a) raso porijeklo, nacionalno ili etničko porijeklo, političko mišljenje ili stranačku pripadnost, ili članstvo u sindikatima, religijsko, filozofsko ili drugo uvjerenje, zdravstveno stanje, genetski kod, seksualni život;

b) krivične presude;

c) biometrijske podatke,

- *nosilac podataka* je fizičko lice čiji se identitet može ustanoviti ili identifikovati, neposredno ili posredno, naročito na osnovu jedinstvenog matičnog broja te jednog ili više faktora karakterističnih za fizički, fiziološki, mentalni, ekonomski, kulturni ili socijalni identitet tog lica,

- *obrada ličnih podataka* podrazumijeva bilo koju radnju ili skup radnji koje se vrše nad podacima, bilo da je automatska ili ne, a posebno prikupljanje, unos, organizovanje, pohranjivanje, prerađivanje ili izmjenu, uzimanje, savjetovanje, korišćenje, otkrivanje prenosom, širenje ili na drugi način omogućavanje pristupa podacima, svrstavanje ili kombinovanje, blokiranje, brisanje ili uništavanje,

- *kontrolor* je svaki javni organ, fizičko ili pravno lice, agencija ili drugi organ koji samostalno ili s drugim vodi, obrađuje i utvrđuje svrhu i način obrade ličnih podataka na osnovu zakona ili propisa.

Kako je naprijed utvrđeno, Ministarstvo je donijelo Pravilnik kojim je propisana obrada ličnih podataka učenika osnovnih i srednjih škola, koji otkrivaju njihovo zdravstveno stanje, te podatke o njihovim aktivnostima u digitalnom prostoru u Evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika.

Dakle, Ministarstvo je Pravilnikom omogućilo obradu ličnih podataka učenika osnovnih i srednjih škola na način da se obrađuju podaci koji otkrivaju njihovo zdravstveno stanje i njihove profilne slike na društvenim mrežama u Evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika. Prema tome, Ministarstvo je kontrolor koji je donošenjem Pravilnika omogućio obradu ličnih podataka učenika osnovnih i srednjih škola sa područja Kantona Sarajevo.

Osnovne i srednje škole sa područja Kantona Sarajevo su takođe kontrolori, koji primjenjujući Pravilnik Ministarstva, neposredno vrše obradu ličnih podataka učenika u Evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika.

Prema članu 4. Zakona kontrolor je obavezan da:

- „a) lične podatke obrađuje na pravičan i zakonit način;*
- b) lične podatke koje prikuplja za posebne, izričite i zakonite svrhe ne obrađuje na bilo koji način koji nije u skladu s tom svrhom;*
- c) obrađuje lične podatke samo u mjeri i obimu koji je neophodan da bi se ispunila određena svrha;*
- d) obrađuje samo autentične i tačne lične podatke, te da ih ažurira kada je to potrebno;*
- e) lične podatke koji su netačni i nepotpuni, s obzirom na svrhu zbog koje su prikupljeni ili se dalje obrađuju, izbriše ili ispravi;*
- f) obrađuje lične podatke samo u vremenskom periodu koji je neophodan da bi se ispunila svrha za koju su podaci prikupljeni;*
- g) lične podatke čuva u obliku koji dozvoljava da se nosioci podataka identifikuju ne duže no što je to potrebno za svrhu u koju se podaci prikupljaju ili dalje obrađuju;*
- h) obezbijedi da se lični podaci koji su prikupljeni u različite svrhe ne objedinjuju ili kombinuju.“*

Navedeni principi se moraju na adekvatan način primijeniti kod donošenja zakonskih i podzakonskih akata, kojima se reguliše obrada ličnih podataka. Zakonodavni organi kao i organi uprave koji su na osnovu zakona ovlašćeni da donose propise, dužni su prilikom propisivanja obrade ličnih podataka ispoštovati i pridržavati se navedenih principa obrade ličnih podataka, kako bi ih kontrolori u praksi mogli primijeniti.

Princip pravičnosti i zakonitosti (član 4. tačka a) Zakona) podrazumijeva obradu ličnih podataka na osnovu saglasnosti nosioca podataka u smislu člana 5. Zakona ili da se obrada vrši bez saglasnosti ukoliko je ispunjen jedan od uslova propisanih u članu 6. Zakona.

S obzirom da je Ministarstvo organ javne uprave, saglasnost nosioca podataka za obradu ličnih podataka kao u predmetnom slučaju nije primjenjiva, već je relevantan član 6. Zakona.

U članu 6. stav (1) tačka a) Zakona, određeno je da kontrolor može obrađivati lične podatke bez saglasnosti nosioca podataka: „ako vrši obradu ličnih podataka u skladu sa zakonom ili je obrada neophodna da bi se ispunile nadležnosti utvrđene zakonom“.

Nadalje, Zakonom je propisano da podaci koji otkrivaju zdravstveno stanje spadaju u posebne kategorije ličnih podataka.

Članom 9. stav (1) Zakona, zabranjena je obrada posebnih kategorija ličnih podataka, osim izuzetaka propisanih u stavu (2) istog člana Zakona. Primjenjiv osnov za objavljivanje podataka koji otkrivaju zdravstveno stanje učenika, propisan je u članu 9. stav (2) tačka g) prema kojem je obrada posebne kategorije ličnih podataka dozvoljena ako: „je to od posebnog javnog interesa ili u drugim slučajevima propisanim zakonom. U ovim slučajevima zakon mora sadržavati konkretne odredbe o adekvatnim mehanizmima zaštite“.

U skladu sa principom pravičnosti i zakonitosti relevantni propisi u ovoj pravnoj stvari su:

- Okvirni zakon o osnovnom i srednjem obrazovanju u Bosni i Hercegovini („Službeni glasnik BiH“ broj: 18/03 i 88/17, u daljem tekstu: Okvirni zakon),

- Zakon o odgoju i obrazovanju u osnovnoj i srednjoj školi u kantonu Sarajevo („Službene novine Kantona Sarajevo“ broj: 27/24, u daljem tekstu: Zakon o odgoju i obrazovanju).

Okvirnim zakonom uređuju se principi predškolskog, osnovnog i srednjeg obrazovanja i vaspitanja, obrazovanja odraslih i osnivanja i funkcionisanja institucija za pružanje usluga u obrazovanju u BiH, kao i dopunska nastava za djecu državljana BiH u inostranstvu. Članom 4., 5. i 6. ovog zakona, definisani su principi koji se odnose na pravo djeteta na obrazovanje, značaj dječijih prava i unaprjeđivanje poštivanja ljudskih prava. Ovi principi naglašavaju pravo djeteta na jednakost pristupa i jednakost mogućnosti učešća u obrazovanju bez diskriminacije po bilo kom osnovu, koje zajedno sa pravom na ispravnu brigu za dobrobit njegovog fizičkog i mentalnog zdravlja i bezbjednosti, ima prvenstvo nad svim drugim pravima, te obavezu škola da doprinesu stvaranju kulture koja poštuje ljudska prava i osnovne slobode. Međutim, navedenim zakonom nije propisano uspostavljanje i vođenje evidencija o ličnim podacima učenika.

Zakonom o odgoju i obrazovanju u članu 48. stav (1) propisano je da se u školi u elektronskom i/ili materijalnom obliku vodi dokumentacija i evidencija u skladu sa propisom koji donosi Ministarstvo, dok je u članu 49. propisano da škola vodi evidenciju o učeniku, uspjehu učenika u učenju, vladanju i izostancima, odgojno-obrazovnom radu, radnicima, školskom inventaru, školskom prostoru i drugo.

Istim zakonom je u članu 51., 52. i 54. propisano sljedeće:

#### **„Član 51.**

##### **(Evidencija o učeniku)**

„(1) Evidenciju o učeniku čine podaci o njegovom identitetu (lični podaci o identitetu roditelja, obrazovnom, socijalnom i zdravstvenom statusu i/ili invaliditetu), uspjehu učenika, te podaci o preporučenoj i pruženoj dodatnoj obrazovnoj, zdravstvenoj i socijalnoj podršci.

(2) Lični podaci o učeniku iz stava (1) ovog člana su: ime i prezime učenika, jedinstveni matični broj, spol, datum rođenja, mjesto, opština i država rođenja, obrazovni identifikator, podaci o prebivalištu, podaci o boravku, kontakt podaci, matični broj učenika, nacionalna pripadnost i državljanstvo.

(3) Lični podaci o roditelju učenika iz stava (1) ovog člana su: ime i prezime roditelja, adresa, mjesto, opština stanovanja, kontakt telefon, odnosno adresa elektronske pošte na koje je moguće prenijeti hitne poruke roditelju u vrijeme kada učenik boravi u školi.

(4) Podaci o obrazovnom statusu učenika iz stava (1) ovog člana su podaci o vrsti škole i trajanju obrazovanja i odgoja, organizaciji odgojno-obrazovnog rada, obaveznim i izbornim predmetima, fakultativnim predmetima, stranim jezicima, podaci IPP-u, Individualno edukacijskom programu (u daljem tekstu: IEP) i Individualno tranzicijskom planu (u daljem tekstu: ITP), dopunskoj i dodatnoj nastavi, cjelodnevnoj nastavi i produženom boravku, slobodnim aktivnostima za koje se opredijelio i drugim oblastima školskog programa u kojima učestvuje, učešću na takmičenjima, nagradama, izostancima, izrečenim odgojno-disciplinskim mjerama.

(5) Podaci o zdravstvenom statusu učenika iz stava (1) ovog člana, na osnovu dostavljenog izvoda iz medicinske dokumentacije, obrađuju se radi osiguranja posebnih odgojno-obrazovnih potreba učenika i opšte dobrobiti učenika, a to su sljedeći podaci: o zdravstvenom statusu učenika (zdrav/bolestan), vrsti oboljenja, dijagnozi, terapiji, mjerama podrške i sl.

(6) Podaci kojima se određuje socijalni status učenika, roditelja su: podaci o uvjetima stanovanja (stanovanje u stanu, kući, porodičnoj kući, podstanarstvu, domu, da li učenik ima svoju sobu i drugim oblicima stanovanja), udaljenosti domaćinstva od škole, stanju porodice (broj članova porodičnog domaćinstva, da li su roditelji živi, bračni status roditelja, samohrani roditelj, njihov obrazovni nivo i zaposlenje, penzioner roditelj), kao i podatak o primanju novčane socijalne pomoći i da li porodica može obezbijediti užinu, knjige i pribor za učenje.

#### **Član 52.**

##### **(Evidencija o uspjehu učenika)**

(1) Evidenciju o uspjehu učenika čine podaci o:

a) ocjenama,

- b) zaključnim ocjenama iz nastavnih predmeta na kraju prvog i drugog polugodišta,
  - c) izostancima,
  - d) pohvalama i nagradama,
  - e) odgojno-disciplinским mjerama i ocjenama iz vladanja,
  - f) izdatim javnim ispravama,
  - g) predmetnim, razrednim i drugim ispitima,
  - h) rezultatima eksterne mature i drugim ispitima i oblicima provjere znanja, koji se obrađuju u skladu sa ovim zakonom i
  - i) drugim statusima/okolnostima u skladu sa potrebama Ministarstva i/ili Instituta.
- (2) Evidencija iz stava (1) ovog člana vodi se i putem elektronskog dnevnika koji je sastavni dio EMIS sistema.

#### **Član 54.**

##### **(Način prikupljanja podataka za evidenciju)**

- (1) Lične podatke, koji se prikupljaju i obrađuju u EMIS-u, a potiču iz javnih isprava, dostavljaju školi roditelji, odnosno radnici lično. Izuzetno, podatke iz javnih isprava škola ili Ministarstvo može pribaviti po službenoj dužnosti.
- (2) Izuzetno, lični podaci koji se obrađuju u EMIS sistemu zavisno od prirode tih podataka mogu biti pribavljeni na propisanom obrascu EMIS, kao izjave i izjašnjenja roditelja.
- (3) Na osnovu podataka unesenih u EMIS škola izdaje javne isprave.“

Dakle, naprijed citiranim odredbama Zakona o odgoju i obrazovanju propisane su vrste ličnih podataka učenika koji se obrađuju u evidenciji o učeniku i o uspjehu učenika, te način na koji se isti prikupljaju.

Kada je u pitanju obrada podataka o zdravstvenom stanju učenika, odredbama člana 51. stav (5) Zakon o odgoju i obrazovanju, jasno i nedvosmisleno je propisano da se u evidenciji o učeniku obrađuju podaci o zdravstvenom statusu učenika i to podatak zdrav/bolestan, vrsta oboljenja, dijagnoza, terapija, mjere podrške, a sve na osnovu dostavljenog izvoda iz medicinske dokumentacije, koji shodno članu 54. dostavljaju roditelji.

Nadalje, Zakonom o odgoju i obrazovanju u članu 74. propisano je sljedeće:

- „(1) U školi se kontinuirano realizuju sadržaji sa učenicima svih razreda usmjereni na prevenciju različitih oblika nasilja/neprihvatljivih oblika ponašanja, potiče dobrobit učenika i njihova zaštita u skladu sa propisom kojeg donosi Ministarstvo, na prijedlog Instituta.
- 2) Nastavnici/stručni saradnici u toku realizacije odgojno-obrazovnog rada prepoznaju faktore rizika koji mogu narušiti najbolji interes djeteta i osiguravaju pravovremenu stručnu podršku i tretman.
- (3) Škola u saradnji sa roditeljom učenika i uz podršku drugih institucija u zajednici (nadležni centar za socijalni rad, centar za mentalno zdravlje, nadležna policijska uprava) prati psihosocijalno stanje učenika i preduzima mjere da svaki učenik dobije pomoć i podršku potrebnu za prevazilaženje takvih problema.
- (4) Škole su obavezne:
  - a) stvarati uslove za zdrav mentalni i fizički razvoj, te dobrobit učenika,
  - b) pružati savjetodavni rad učenicima,
  - c) pravovremeno uočiti određene faktore rizika koji mogu ugroziti psihofizičku dobrobit učenika,
  - d) sprječavati neprihvatljive oblike ponašanja,
  - e) brinuti se o sigurnosti učenika,
  - f) osigurati uslove za uspješnost svakog učenika u učenju i vladanju,
  - g) pratiti zdravstveno stanje učenika dok boravi u školi i o tome obavještavati roditelje i
  - h) voditi evidenciju o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika, te provoditi mjere odgojno-obrazovne podrške i stručnog tretmana učenika u skladu sa propisom koji donosi Ministarstvo.“

Dakle, odredbama člana 74. Zakona o odgoju i obrazovanju, pored obaveze sprječavanja neprihvatljivih oblika ponašanja, školama je propisana i obaveza da prate psihosocijalno stanje učenika, da preduzimaju mjere da svaki učenik dobije pomoć i podršku potrebnu za prevazilaženje takvih problema, te da blagovremeno uočavaju određene faktore rizika koji mogu ugroziti psihofizičku dobrobit učenika. Istim članom propisana je obaveza školama da vode evidenciju o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika, te provoditi mjere odgojno-obrazovne podrške i stručnog tretmana učenika u skladu sa propisom koji donosi Ministarstvo.

Nadalje, navedenim članom je u stavu (4) tačka g) propisana obaveza školama da prate zdravstveno stanje učenika dok borave u školi i da o tome obavještavaju roditelje. Međutim, navedenom odredbom niti bilo kojom drugom odredbom Zakona o odgoju i obrazovanju nije propisano da se podaci o zdravstvenom stanju učenika koji se uoče praćenjem dok borave u školi, vode u evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika. Naprotiv, navedenom odredbom je nedvosmisleno određena obaveza školama da o tome obavještavaju roditelje, a ne da takve podatke evidentiraju u bilo kakvu evidenciju.

Shodno odredbama Zakona o odgoju i obrazovanju, podaci koji otkrivaju zdravstveno stanje učenika mogu se obrađivati isključivo u okviru evidencije o učeniku i na način propisan članom 51. tog zakona, a nikako u okviru evidencije o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika jer članom 74. istog zakona nije ni propisana takva obrada podataka o zdravstvenom stanju učenika.

Takođe, članom 74. Zakona o odgoju i obrazovanju nije propisan pravni osnov za obradu ličnih podataka o slikama učenika na društvenim mrežama, u okviru Evidencije o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika. Osim toga, obrada takvih podataka učenika nije propisana niti u jednoj od evidencija koje se shodno odredbama Zakona o odgoju i obrazovanju, vode u školama.

**III** Ministarstvo je Pravilnikom propisalo predmetnu Evidenciju o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika, te u okviru iste obradu podataka koji otkrivaju zdravstveno stanje učenika. Naime, u Evidencionom listu koji je sastavni dio Pravilnika, propisano je da se u istom obrađuju sljedeći podaci učenika i to:

- tačka 33. učenik/učenica ima vidljive tragove opekotina, preloma, modrica, ožiljaka, povreda ili znakove;
- tačka 43. uočavaju se tikovi kod učenika/učenice (nekontrolisane motoričke reakcije);
- tačka 46. učenik se žali na bolove u stomaku, glavobolje, mučnine;
- tačka 48. kod učenika/učenice se uočavaju poteškoće u kontroli eliminacijskih funkcija (mokrenje i pražnjenje crijeva);
- tačka 49. kod učenika se uočavaju govorno-jezičke poteškoće (tepanje, mucanje, usporen razvoj govora).

Dakle, Ministarstvo je Pravilnikom propisalo obradu podataka o zdravstvenom stanju učenika u Evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika.

Kako je naprijed navedeno, podaci koji otkrivaju podatke zdravstvenom stanju predstavljaju posebnu kategoriju ličnih podataka, čija obrada je zabranjena osim u izuzetnim slučajevima propisanim u članu 9. stav (2) Zakona.

Shodno članu. 9. stav (2) tačka g) Zakona, da bi se u Evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika, mogli obrađivati podaci o zdravstvenom stanju učenika, onda takva obrada treba da je propisana zakonom koji mora sadržavati konkretne odredbe o adekvatnim mehanizmima zaštite.

Međutim, Zakon o odgoju i obrazovanju u članu 74. niti u bilo kojem drugom članu, nije propisao takvu obradu ličnih podataka učenika.

Prema tome, jasno je da je Ministarstvo Pravilnikom propisalo i nametnulo školama obradu podataka o zdravstvenom stanju učenika u Evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika, suprotno odredbama Zakona o odgoju i obrazovanju, te suprotno članu 9. Zakona.

Nadalje, Ministarstvo je Pravilnikom propisalo obradu podataka o profilnim slikama učenika na društvenim mrežama (tačka 4. Evidencionog lista-učenik/učenica na profilu na društvenim mrežama uklanja profilnu sliku) u Evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika.

No, kako članom 74. kao ni drugim odredbama Zakona o odgoju i obrazovanju nije propisan pravni osnov za obradu ličnih podataka o slikama učenika na društvenim mrežama u okviru predmetne Evidencije, jasno je da je propisivanje takve obrade ličnih podataka Pravilnikom u suprotnosti sa odredbama relevantnog zakonskog propisa.

Nesporno je da određena ponašanja učenika na društvenim mrežama mogu biti neprihvatljiva i da mogu predstavljati faktor koji ugrožava najbolji interes učenika. Međutim, to ne znači niti daje za pravo Ministarstvu da Pravilnikom propiše obradu podataka o profilnim slikama učenika sa društvenih mreža u predmetnoj evidenciji, iako odredbama relevantnog zakona nije određen osnov za obradu takve vrste ličnih podataka učenika.

Prema Ustavu BiH, u Bosni i Hercegovini neposredno se primjenjuju prava i slobode garantovani Evropskom konvencijom za zaštitu ljudskih prava i osnovnih sloboda kao i njezinim protokolima. Ovi akti imaju prioritet nad svim drugim zakonima.

Pravo na zaštitu privatnosti u pogledu obrade ličnih podataka, jedno je od osnovnih ljudskih prava i proizilazi iz člana 8. Konvencije. Stoga su, pored Zakona, principi ove konvencije relevantni pravni izvori u odnosu na koje se tumači domaće zakonodavstvo.

Član 8. Konvencije glasi:

1. „Svako ima pravo na poštivanje svog privatnog i porodičnog života, doma i prepiske.
2. Javna vlast se ne miješa u uživanje ovog prava, osim ako je takvo miješanje predviđeno zakonom i ako je to nužna mjera u demokratskom društvu, u interesu nacionalne sigurnosti, javne sigurnosti, ekonomske dobrobiti zemlje, sprečavanju nereda ili sprečavanju zločina, zaštititi zdravlja i morala, ili zaštititi prava i sloboda drugih.“

Svaka obrada ličnih podataka je ograničenje privatnosti, a da bi bila zakonita prema članu 8. stav 2. Konvencije moraju kumulativno biti ispunjena tri uslova:

1) **da je propisana zakonom** - Prema praksi Evropskog suda za ljudska prava, izraz "propisano zakonom" i "u skladu sa zakonom" podrazumijeva ne samo puko propisivanje radnje domaćim zakonom, nego kvalitet tog zakona. Zakon treba biti podjednako i pristupačan i predvidiv, odnosno formulisan dovoljno precizno da omogući građaninu da usaglasí svoje ponašanje. Da bi zakon ispunio ove zahtjeve mora pružiti određenu mjeru zakonske zaštite od proizvoljnog miješanja javnih vlasti u prava koja štiti Konvencija. Zakon mora dati dovoljno jasan obim bilo kakvog diskrecionog prava koje se daje javnim vlastima, kao i način kako se ono izvršava (Predmet: Rotaru protiv Rumunije, predstavka br. 28341/95, presuda od 4 maja 2000. godine stav 52, Rekvenyi protiv Mađarske, predstavka br. 25390/94 presuda od 20 maja 1999. godine, stav 34).

2) **da se vrši u jednom od legitimnih ciljeva** - Dopušteni osnov za ograničenja prava privatnosti zahtjeva „da se isto vrši u jednom od legitimnih ciljeva“ i obuhvata državnu sigurnost, javnu sigurnost, javni red, sprječavanje nereda ili kriminala, zaštita zdravlja ili morala, zaštita ugleda, prava i sloboda drugih, ekonomske dobrobiti zemlje, sprječavanje otkrivanja obavještenja dobijenih u povjerenju i očuvanje autoriteta i nepristrasnosti sudstva. Ipak samo pozivanje na ove uslove od strane države nije dovoljno, jer bi onda garantovanje prava utvrđenih Konvencijom bilo iluzorno.

3) *da je neophodna u demokratskom društvu* - „Neophodnost u demokratskom društvu“ prema stanovištu Evropskog suda za ljudska prava pretpostavlja vaganje suprotstavljenih interesa u cilju utvrđivanja da li je ograničenje garantovanih prava opravdano i u skladu sa Konvencijom.

„Neophodnost“ prema tom stavu znači – hitno društveno potrebno i da ograničenje prava mora biti srazmjerno cilju kome se teži što obavezuje nacionalne vlasti da moraju primjeniti metod koji je najmanje restriktivan u odnosu na pravo privatnosti (Predmet: Sporrang i Lonroth protiv Švedske, predstavka br. 7151/75, presuda od 23 septembra 1982, stav 69).

„Proporcionalnost“ se u kontekstu analize neophodnosti u demokratskom društvu javlja kao test u kojem se ispituje da li je „restriktivna mjera srazmjerna legitimnom cilju kojem se teži“, da li postoji „goruća socijalna potreba“ za takvu restrikciju, te da li su razlozi koji su dati „relevantni i dovoljni“.

Praksa Evropskog suda za ljudska prava je najbolja mjera i ona se mora uzeti u obzir prilikom odlučivanja o bilo kojem pravu i presude zapravo služe ne samo rješavanju konkretnih predmeta već, opštije, da rasvijetle, čuvaju i razvijaju pravila uvedena Konvencijom, doprinoseći na taj način poštovanju obaveza koje su države preuzele pristupajući Konvenciji (Predmet: Irska protiv Ujedinjenog Kraljevstva, predstavka br. 5310/71, presuda od 8 januara 1978, stav 154).

Dakle, da bi određeno miješanje u privatnost bilo zakonito prema članu 8. stav 2. Konvencije, moraju kumulativno biti ispunjena sva tri uslova: da je isto propisano zakonom, da je nužno društveno potrebno i da ograničenje prava mora biti srazmjerno legitimnom cilju kome se teži.

U predmetnom slučaju, obrada ličnih podataka o zdravstvenom stanju učenika i podataka o njihovim profilnim slikama na društvenim mrežama u okviru Evidencije o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika, nije propisana zakonom. Osim što takva obrada ličnih podataka nije propisana zakonom, nije neophodno da se prate učenici u privatnoj sferi života, već je to zadatak roditelja i staratelja. Pri tom, takvom sistemskom obradom stvara se zbirka ličnih podataka o učenicima u okviru koje se evidentiraju naprijed navedeni podaci, što učenicima može neopravdano nanijeti štetu kroz buduće školovanje. Stoga, takva obrada ličnih podataka učenika ne treba uopšte da se propisuje zakonom.

Imajući u vidu sve prednje navedeno, neosnovana su pozivanja Ministarstva na odredbe člana 68. Zakona o organizaciji organa uprave u FBiH, te na odredbe člana 3., 48., 49., 50., 51., 52., 57., 58. i 74. Zakona o odgoju i obrazovanju, kao pravnom osnovu za propisivanje obrade podataka o zdravstvenom stanju učenika i podataka o profilnim slikama istih na društvenim mrežama u predmetnoj evidenciji.

U skladu sa navedenim, utvrđeno je da je Ministarstvo suprotno odredbama Okvirnog zakona i Zakona o odgoju i obrazovanju, Pravilnikom propisalo obradu ličnih podataka zdravstvenom stanju učenika i podataka o njihovim profilnim slikama na društvenim mrežama u Evidenciji o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika. Pri tom, predmetno propisivanje obrade podataka o zdravstvenom stanju učenika u navedenoj evidenciji, u suprotnosti je sa članom 9. Zakona.

Takvo propisivanje obrade ličnih podataka je u suprotnosti sa principom pravičnosti i zakonitosti iz člana 4. stav (1) tačka a) Zakona.

Stoga, izrečene su upravne mjere kao u tački I i II dispozitiva ovog Rješenja.

U cilju ostvarivanja prava na privatnost i zaštitu podataka učenika, te ekonomičnosti postupka, potrebno je da Ministarstvo na adekvatan način dostavi ovo rješenje svim osnovnim i srednjim školama sa područja Kantona Sarajevo. Takođe, imajući u vidu da je predmetna obrada ličnih podataka zasnovana na odredbama Pravilnika, potrebno je da Ministarstvo isti izmjeni u relevantnom dijelu, a što je sve naloženo tačkom III dispozitiva ovog rješenja.

Shodno navedenom, na osnovu člana 40. stav (2) tačka a) Zakona i člana 78. Zakona o upravi, riješeno je kao u dispozitivu ovog Rješenja.

**Pouka o pravnom lijeku:**

Protiv ovog rješenja može se izjaviti žalba direktoru Agencije za zaštitu ličnih podataka u Bosni i Hercegovini u roku od 8 dana od dana prijema istog.

**INSPEKTOR**

**Dostaviti:**

- Ministarstvo za odgoj i obrazovanja  
Kantona Sarajevo  
Reisa Džemaludina Čauševića br.1  
71000 Sarajevo,
- U spis predmeta.